


Governu sei aprova orsamentu retifikativu ba projetu infraestrutura sira

17 de Junho de 2016, 12:25

Konsellu Ministru tenke debate orsamentu retifikativu ba 2016 iha semana oin ne'ebé, esensialmente, tenke uza hodi finansia projetu infraestrutura sira ne'ebé la'o hela, hatete vise-ministru Finanzas horisehik ba Lusa.



Hélder Lopes esplika katak orsamentu retifikativu halo hafoin análise hosi Ajénsia Dezenvolvimentu Nasionál (ADN) no hosi Ministériu Planeamentu no Investimentu Estratéjiku ne'ebé "determina katak presiza liután osan iha finál tinan ne'e ba projetu infraestrutura sira ne'ebé la'o hela".

"Presiza liután osan ba projetu sira ne'ebé la'o hela. Ha'u lakohi espekula kona-ba valór total ne'ebé la'o hela. Ami sei servisu hela kona-ba valór finál. Ami hein katak bele konklui ona dadus hodi apresenta iha Konsellu Ministru iha semana rua oin mai", nia refere.

Vise-ministru ne'e esplika katak orsamentu retifikativu sei inklui mós besik millaun 130 relasiona ho kontributu Governu nian iha ámbitu kontratu parseria públiku-privada ne'ebé asina iha fulan ne'e ho franseza Bolloré ba Portu foun Tibar.

"Ami presiza retifikativu tanba Governu asina kontratu ba Portu Tibar no kontributu Governu nian mak millaun 130. Ami sei hatama mós ida ne'e iha retifikativu tanba iha tinan oin ita-nia tetu gastu kí'ik tebes no ita sei laiha fatin atu hatama ida ne'e", nia afirma.

Retifikativu sei la abranje desizaun aumentu saláriu iha funsionáriu rejime jerál funsaun públika nian, ne'ebé Governu foin aprova, tanba medida ne'e foin bele aplika hahú hosi 01 janeiru 2017, ka, ho Orsamentu Estadu tinan oin nian.

Lembra katak iha fulan kotuk nia klaran, iha Jornada Orsamentál, Ministériu Finanzas timoroan propoin másimu gastu ho dólar rihun millaun 1,2 iha Orsamentu Estadu 2017, opsau karun liu entre tolu ne'ebé apresenta, ne'ebé sei implika levantamentu signifikativu hosi Fundu Petrolíferu.

Halo konta sira bazeia ba soma projesaun reseita no levantamentu Fundu Petrolíferu hosi Rendimentu Sustentável Estimadu (RSE), ka, valór ne'ebé sei permite atu labook iha kapitál fundu ne'e rasik, maibé iha de'it nia rendimentu.

Senáriu ne'e baratu liu "maibé mós difísil liu" iha termu despeza mak limita orsamentu iha de'it dólar millaun 702, soma

loloos hosi previzaun reseita la'ós petrolífera ho SER.

Iha senáriu daruak, tetu fiskál sei sa'e ba dólar rihun millaun, buat ne'ebé bele implika nesidade adisionál ho dólar millaun 317, ne'ebé bele hetan ka hosi levantamentu esesivu FP ka empréstimu.

IKus liu, iha senáriu ne'ebé alargadu, Ministériu Finansas propoin tetu másimu ho rihun millaun 1,2, buat ne'ebé, sei implika, levantamentu adisionál (ka empréstimu) ho valór dólar millaun 517 resin.

SAPO TL ho Lusa

- Ho direitu hotu-hotu rezervadu.